

671.1243
084
12

昌黎縣志

三 卷

地理下

古蹟 名勝

二 卷

地理上

交通 山阜

關隘 河流

昌黎縣志卷二

地理志上

壹山阜

昌黎山邑也自北塞蜿蜒東南走至昌黎突駐作東西橫列形勢如錦屏峯之高石之峭邱壑之多林木之蓊蔚花草之美麗果品之饒富亦遂爲畿東諸邑冠

碣石山踞縣之北前後左右蜿蜒數十里名見於禹貢其巍峨爲幾東諸山冠而尤以縣正北十五里之仙臺山爲最高峯俯視岡巒起伏數十峯皆邱垤耳

古碣石辭

古碣石者本禹貢冀州之域蓋今東南海運自海而北達漳河實出乎此予喜其符唐虞之舊制也勒之以辭

惟王建國實曰冀都北極之運萬邦作孚宮廷彤赫時彼中居士女和會隘鄽塞鄆江橋白粲淮稻黃淤聿官有漕竟海其艫偉哉

碣石枕我海隅表此水道長爲委輸上蟠乾奧下結坤區割流獫
養披秀醫閭日月播盪星辰盤孟怪神罔象鼉鰲龍魚鰓扶纜守
翼奮鱗驅番輦國用來通帝家自國有貢或河而渠或砥斯鑿或
絕或踰繭絲紉帛金寶象珠搜毫竭縷滿廩壓車矧茲米粟誠係
藏儲得一主祚懸萬命軀漢乖轉輓唐厯征需於穆我后仰唐承
虞按之圖籍實以德符普天率土瞻戴罔渝偉哉碣石厥狀屹如
若柱斯植若丹斯塗溟漲如席濁渾以趨峭巖勒辭永代斯模
仙臺山俗名仙臺頂即碣石山也由南面登之去城十五里太行
分派東來惟此與裂頭山景忠山兔耳山角山爲營平五頂當山
頂有大石如柱形山之所以名也

明楊于陞於山腰刻仰止二字又鐫有凭峴一嘯四字金天會十
五年有僧建臺四面立石欄絕壁萬仞上凌霄漢登之遠望長城

如帶渤海如沼縣城彈丸耳臺前寺其上石壁刻碧雲峯三大字
旁署乙酉仲夏西秦徐可大書每字五尺許後頂有一石室係四
塊巨石築成內有石像俗云五雷殿舊傳頂上有大禹伯益廟今
圯無存惟前頂之天仙祠尙在

仙臺有二徑中間南面一石鐫天門第一四字下鐫解脫嶺三字
天門第一上西壁北鐫天門海濤四字又上有地名把式場鐫天
門第二四字東徑有黑峪溝長六里餘上頂險峻名閻王鼻鐫止
水二字大二尺餘溝中四壁峭立千尋有瀑布泉中鐫削壁流泉
四字其大如斗爲縣丞楊于芳題

歡喜嶺在仙臺頂半迤東登頂者至此如出中霤稍可望遠故名
直南向下亂石交牙俗謂之閻王鼻兩山夾峽翳不見日長谿路
滑湛湛陰陰水經注言碣石如甬道數十里者疑卽此歟

案舊志今登仙臺者自南面二道其北面澗壑連延險陡陰滑並天橋柱之下人亦罕至真有甬道數十里之形勢故登仙臺頂無北路

碣石山縣西二十里舊府志云今昌黎縣乃古三邑地謂秦縣及王莽之選武馮德也其爲碣石當自昌黎撫寧南皆是茲爲大碣石因天橋柱指之云此以天橋柱爲碣石新府志云山頂有石卓立如柱相傳爲天橋柱俗傳爲碣石然此石實不在山頂由雲峯之右稍上道路崎嶇人迹罕至海道望之不能見也此山卽仙臺頂之北面而仙臺頂則正在此山之頂實一山也石柱在仙臺頂之西北仙臺前臺後臺雖若分爲二而由南面視之形如覆鐘高可一里有餘通趾頂實爲一石而非累積所成聳矗山頂山高七里通仙臺頂計之殆將十里百里望之瞭然可辨可以爲大矣則

所謂大碣石斷當屬之山巔之仙臺頂而非山背之天橋柱所能當以其足爲海道行舟遙望之標準允協於夾右之義也且地理志特標曰大碣石

驪城縣大碣石山在其西南卽正文舊府志以爲註亦稍誤

有大者當必有

小者仙臺頂爲大碣石而其餘卽小碣石理亦或然史言秦始皇刻銘碣石門今仙臺頂之下不遠有二小山對峙其狀如門未知是否然又言二世至碣石悉刻始皇所立石則似始皇之銘別立石刻之如嶧山碑之例而非卽刻碣石之上他如漢武登之名漢武臺魏武登之觀海賦詩魏文成登之改名樂遊山高齊文宣登之隋煬帝登之賦詩唐太宗登之刻石紀功實卽仙臺頂之一山也但山高路峻南北隔越不能相通此所標去縣二十里乃至天橋柱之路非仙臺頂之路仙臺路在縣北十五里今旣考眞又並

列之於後

同治四年志

碣石之疑一誤於王橫五百里淪入於海之說不思地至五百里豈能空闊無人並無所屬郡邑之名而漫言五百里乎況碣石爲大山卽淪於海斷不能滅頂何至渺無蹤迹可見也禹貢導山言太行恆山至於碣石則碣石與太行恆山必脈絡相聯形勢相應舊府志以爲地理志旣名爲大碣石必有小碣石則撫寧縣南一帶連山皆爲碣石其說近理且記石壁有五十四字爲石花所掩不可辨識又有明昌幾年四字乃申之曰碣石當有三此仙臺頂之碣石非禹貢夾右之碣石則仍信王橫妄說也再誤於蔡九峯作尙書傳於所引漢書地理志驪城縣大碣石山在其西南而自增河口之地漢書本無此四字也九峯生於南宋南北分裂何由知北方之山川形勢此不過以意爲之耳然碣石之必不在河口不在海濱不必繁稱博引卽禹貢之文思之可曉然矣導河積石

至於龍門一節凡河濱之山如華陰砥柱大伾皆著之而至於大陸以下不復言山大陸澤也過此地勢平衍無大山之隔闕故可播爲九河同爲逆河入於海文義本自明白使碣石果在河口禹貢當言至于碣石入于海矣則碣石之不在河口可知矣至兗州言貢道至島夷皮服夾右碣石入于河是碣石去河海尙遠故望爲標準夾之右乃可入於河耳使在河濱則禹貢當直言至於碣石入於河而不必言夾右矣經文自明而後人多生轆轤新府志於舊志大小碣石石壁字迹之說可信者皆刪之而獨取此非夾右之碣石其亦未之思矣明郭造卿言遣人求始皇銘迹而無之此其所遣者果深心好古之士乎由此一端遂起疑惑抑思此地僻在偏隅且屢經淪陷安得有嗜古之士如嶧山之棗木傳刻瑯琊臺之包糠摹讀者相隔數千年其爲土石所掩沒後人所椎壤

風雨所剝落皆不可知泥是以求碣石未免執其末而忽其本矣
仙臺之西有石柱高數十丈石色青白與本山不類下方有後人
刻禹王繫船處五字妄造無疑王煦曾親至其下望上方隱隱有
字迹而苔封不可辨或者爲秦始皇銘迹是耶非耶後有梯雲駕
空者當能辨之案史記始皇所刻乃碣石門二世復有所刻卽門
字思之則所刻銘亦未定在碣石之上舊志有兩山門峙疑其或
者爲碣石門但空山崎嶇誰復能披榛剔蘚尋求古蹟如漢武登
之而名以漢武臺魏文成登之而改名樂遊山皆此仙臺頂之一
山旣改山名皆當有所刻記唐太宗征高麗歸登碣石刻石紀功
言刻碣石門者自是刻於門上言刻石者當是別立一石而今皆
杳無蹤迹矣夫平地之祠宇寺觀傳爲唐以來所建雖遞爲修理
班班可考而求唐時碑碣每百不存一而況深山遠代古今之徑

路有改移則人不能至野火之焚燒樵牧之擊損山石亦時自摧裂較平地尤易湮沒也哉

同志四年
馬恂記

畿輔通志於碣石一條考證詳慎但因驪城屬右北平而肥如索縣屬遼西以今地勢揆之中間隔斷遂疑樂亭爲驪城而樂亭西南無山不得已而信淪海之說不知驪城實爲撫寧今縣治轉徙近南故地似爲盧龍隔斷不能屬右北平然漢右北平治平岡在今平泉州地若由邊外一帶自可與撫寧邊外地相連肥如索縣南一帶相連原不隔斷也

禹貢導山言至于碣石特以山之高大足爲標識者言之非必拘於地脈之連絡古今之斷斷以碣石爭者其故亦不在此也而在冀州之夾右碣石入于河所以爭者以爲九河必由碣石入海也於是有王橫之妄說而以無可指實之五百里淪之於海而蔡氏

直謂九河入海之處有碣石在其西北岸遂將執碣石以求九河而九河茫然碣石愈杳然矣夫堯冀諸地本無此石而援濡易諸水中高不與河通之故駁九河之必不能從平州之境入海其說誠然乃因九河之不於是入海而遂舍平州以別求所謂碣石則大誤也夫戰國策常山九門之碣石人知非矣而蔡氏集傳引漢書地理志驪城縣大碣石在其西南而實以河口之地平州之南烏有所謂河口者哉是蓋未深繹夾右之義也善夫孔穎達之說曰導河入海傳云入於渤海也計渤海北距碣石五百里禹貢行碣石不得入於河也蓋遠行通水之處北盡冀州之境然後南回入河而逆上夾右者夾行此山之右則碣石非河口之地審矣蓋海道浩淼必望大山之特出者以爲標準海過平州趨南瀛渤之間地勢坦衍千百里中無大山可望故必以碣石爲準而夾右以

行然後可南轉以入於河然則碣石特取其遠望可爲標準不惟不必求之於河口並不必求之於海旁矣酈道玄言驪城枕海有石如甬道數十里當山頂有大石如柱形韋昭以爲碣石其山則似今臨榆縣之角山然又謂昔在河口海濱淪入於海則亦未明夾右之義爲王橫之說所誤耳漢武帝紀注文穎云石在遼西橐縣橐縣今之昌黎縣也其說蓋與酈異酈所云之碣石誠海旁而驪城爲今之撫寧縣角山實在其東南顯與地理志相歧今昌黎縣之仙臺頂去海三十里猶之海畔也上有石柱高數百丈自海中望之矗矗高出可爲標識其地實當撫寧縣之西南夫輿地之書地理志最爲近古而可信則斷之以驪城之西南而碣石定矣乃地理今釋以爲求之於撫寧昌黎杳無碣石蹤迹其意遂以道玄文穎之說爲不足據而直以肇域志所言山東海豐縣有馬谷

山即古碣石且援劉文儒之說以爲合於禹貢入河入海之文則尤爲武斷獨不思碣石果在山東班氏豈指千里外杳不相及之山以爲右北平驪城之封域乎推原其故殆不知古之驪城今析臨榆而求於今之撫寧而驪城無碣石矣又不思海道標準之山不必附在海旁而問諸海濱螭縣無碣石矣於是泥河口以求碣石而夾右之義亦晦矣豈不誤哉昔曹孟德之伐烏桓也蓋嘗臨碣石而賦詩道里所經夫豈海豐之馬谷所可假者或者曰操自無終回軍上徐無山出盧龍口經白檀歷平岡涉鮮卑庭東指柳城然操之進軍本以故道之海濱洿下故用田子春計履險蹈虛以乘烏桓之不意至戰勝而歸何必不從故道方軌徐行以就其安而便糧運者且操將伐烏桓預鑿泉州渠以通運胡氏三省以爲泉州渠東至海陽縣樂安亭南與濡水合而入於海泉州今之

寶坻縣樂安亭今之樂亭縣然則由泉州渠而糧運誠於行故道爲便操而歸從故道則昌黎之碣石相去至近東臨之以觀滄海

亦宜矣

同治四年縣志

秦始皇心咸服惠論功勞賞及牛馬恩肥土域息帝奮威德併諸侯初一泰平墮壞城郭決通川防夷去險阻地勢既定黎庶無繇天下咸撫男樂其疇女修其業事各有序惠被諸產久並來田莫刻不安所羣臣誦烈請

魏武帝碣石篇云東臨碣石以觀滄海水何澹澹山島竦峙樹木羃生百草豐茂秋風蕭瑟洪波湧起日月之行若出其中星漢燦爛若出其裏幸甚

至哉歌以詠志

孟冬十月北風徘徊天氣肅清繁霜霏霏鷗鷺晨鳴鴻鴈南飛鷺鳥潛藏熊羆窟棲錢鏹停置農收積場逆旅整設以通賈商幸甚

至哉歌以詠志

鄉土不同河朔隆寒流漸浮漂舟船行難不入地豐藪深奧水竭不流冰堅可蹈士隱者貧勇俠輕非心常歎怨戚戚多悲幸甚

至哉歌以詠志

神龜雖壽猶有竟時騰蛇乘霧終爲土
灰老驥伏櫪志在千里烈士暮年壯心不已
盈縮之期不但在天養怡之福可得永年幸甚
至哉歌以詠志

明李攀龍碣石篇云碣石中怒滄海北倚元氣吐欲若偃若起長
風相薄跳波千里懸流冒顛天漢外紀地軸高標轂轉白日與齊
俱入與汨俱出

委蛇者河千里一曲方之舟之匪芻伊粟太行詰曲西北是經
車轍馬迹曰不遑寧於鑠聖人依其在京差次更功郡國以成
羽翼未就鴻鵠徘徊神龍失水螻蟻所裁珠不暗投劍不倒持
能弗用利勿處於疑高才者妒匪但其人逃名避世以保其身

天橋柱俗亦名棒槌山在仙臺頂下偏西距城二十里石柱高聳
從西面望之如石塔然卽十景之天柱凌雲

山心洞在龍潭下百步有巨石大如夏屋石底有穴可容百人

香山縣北八里在仙臺山麓寶峯臺左峯勢秀削其後卽陟龍潭
道也舊志云峯後有庵果本繁嘉潭水直噴其左水流一里入
地五里至龜石橋復出爲地橋去縣八里蓋碣石環城爲展觀

音踞齒其左右肩五峯筆架峯其左右臂也舊有香山書院今廢

紗帽山縣北八里仙臺頂麓寶峯臺之右與香山東西並峙

寶峯山卽寶峯臺在仙臺山麓香山紗帽山之中卽水巖下院昔有井七十二今存者十餘有寺寺前得月亭爲遊人憩息之所上多題詠寺前有八棱石幢爲前代古物

踞齒山卽踞齒崖又名翠屏山在仙臺山右高亞於仙臺而他峯弗逮也

西五峯在仙臺山左亦支阜也距城十二里高稍亞於踞齒山亦爲踞齒外之巨臂北峯名平斗東峯名望海西峯名挂月東北峯名錦繡西北峯名飛來東峯削壁上有深洞又有一峯宛如浮圖名藥師塔 峯前有韓文公祠圓通寺右側舊有石壁如

洞形俗傳若要洞門開還得劉九來范志完因與已小字相符
遂鑿開後改劉九洞爲范公洞洞下石隙出泉水光清澈石壁
鐫澄光二字

廟後有井三形如半月味甘冽壁上鐫玉液泉三字俗呼菩薩
井懸崖上有豎鐫東洋砥柱四字每字約三尺筆力蒼勁再橫
鐫泰山北斗四字每字亦三尺餘皆崇禎辛巳中州范志完題
廟門外東面石壁鐫有白雲鄉三字大如斗邑人崔樹寶題
東五峯與西五峯相連縣東北十五里形如筆架秀絕人寰

高冠山在鋸齒山西高亞於鋸齒山

筆峯山亦名尖山縣西北十里高插雲表

駕鰲山縣西八里

臥虎山縣北五里形似虎故名